

摘藻堂四庫全書薈要

集部

欽定四庫全書薈要

集部

明文衡卷七十八

九

詳校官候選知縣臣吳嗣華



欽定四庫全書薈要卷二萬二百三十一

集部

明文衡卷七十八

明程敏政編

神道碑

兵部尚書贈榮祿大夫少保兼尚書鄺公神道

碑

王直

兵部尚書鄺公既卒之明年皇帝悼念不已詔特贈少保兼兵部尚書進階榮祿大夫而官其子儀為主事儀

奉公衣冠以歸將以某年某月某日葬於某里之原而述公之行請文以刻諸墓道嗚呼公故人也其可辭公諱埜字孟質別號朴齋郴之宜章人曾祖某祖某皆有學行而不仕父子輔為學官縣令名重當時及公貴祖父皆贈兵部左侍郎妣李氏王氏皆贈淑人公早喪母祖母李撫育之見其不凡最鍾愛曰是子能大吾門公孝友勤儉出於天性而撫弟妹尤篤其於學問不待程勸選為邑庠生而泰和王敬先為訓導循循善教公亦

勉勉善學學成取進士遂入都察院理刑獄以廉平得名永樂癸巳拜監察御史時車駕在北京有言南京鈔法阻滯命公往察之衆謂將起大獄公往擒市豪一二以歸奏曰市人聞令皆震懼令鈔法已通矣上頷之而罷倭寇犯遼東公往按問戍守之失律者凡百餘人皆應死公為開陳其可矜狀甚明上然而宥之山海關吏卒邀阻行人以取財亡逃之人則受賕縱之去弊積滋甚公廉得之歸至關悉擒治抵罪弊為之省丙申北京

營造執役之人累鉅萬上念有病者命醫與善藥又慮

其奉行不謹命公察視之公躬履其地令潔其穢汚而
時其藥食由是病者多不死戊戌石州人有詣闕告變
者曰州民與陝人羣聚千餘謀不軌上擢公為陝西按
察副使往理其事果實即以官軍勦戮毋貽民患賜之
楮幣給驛而遣之公至察其誣乃反獄亡命妄言冀脫
死即具以聞上命止弗問而誅其造誣者宣德己酉陝
右饑華亭宜川尤甚公私廩皆竭公巡歷其地憂之乃

移旁縣粟賑焉羸病不能興者命官府煮粥食之民以
全活庚戌至納潁憂歸道聞父喪哀愈甚每號痛輒欲
絕其治喪一用古禮其祭亦如之服除拜應天尹輦轂
之下賦急役繁公一以養民為務事無大小苟可以興
利去害無不用其心至於市征田稅皆酌其平豪猾不
得為輕重賓興之歲公設科取士厚其禮而峻其防得
人為多且撙節其費以待會試故事集而民不擾視異
時蓋省十三四歲大熟麥有兩岐者民歸德於公公拒

弗受正統改元進拜兵部左侍郎時西鄙有警尚書王公往視師公獨任其事上嘉其才荆湘民多隸戎伍公家亦與焉至是特除其籍以示寵己未京師淫雨壞官民廬舍公奏曰此陰氣為沴兵陰也皆臣等不職所致乞罷歸田里上慰勉之師征麓川公舉蔣貴可任卒有功衆人以為知人天下軍衛總小旗當代者於例必就試京師有道遠無資不能來者終身不得代公請各於都司試之人以為便時有言欲變易軍伍使南北之人

各適其土性下羣議衆依違其間公曰此舊制不可紊
稍有變易將不勝其弊咎將誰歸卒不動嘗自念曰治
軍吾職也當為國家惜其力養其銳氣以備不虞故凡
軍家利病有當興革者必為上言之多見信從己已邊
報敵入寇上命治軍旅而權姦獨主親征不與外廷議
及詔下大臣皆以為不可即上章請留不聽公從行出
關屢奏言么麼寇不宜屈至尊惟指麾諸將足以成功
不聽權姦惡其數言事欲踈之勅公與戶部尚書王佐

隨老營至懷安墜馬幾殆從者請少留懷安就醫藥公
曰天子在前吾為大臣豈可託疾求自便力疾而往至
雲中車駕回鑾然行止疾徐惟權姦所命至宣府敵騎
踵至公深以為憂再上章請疾驅入關而嚴兵為殿皆
不報最後公詣行殿申前請權姦怒曰汝腐儒安知兵
事再妄言必死公抗言曰我為社稷生靈而言何得以
死懼我權姦愈怒叱左右扶出公與王公相對泣帳中
明日次土木營中無水士馬皆饑渴寇四面集矢下如

雨衆奮欲戰又為權姦所沮須臾師覆公遇害蓋八月十五日也生於洪武乙丑某月某日年六十五娶吳氏有賢行子男一即儀女一嫁同里士人歐陽瑄孫男三琦琳珍公學博行莊仕宦四十年風裁凜然見重於士大夫威行惠施近悅遠懷服仁蹈義至老不衰此其平生大節也權姦誤國而卒陷焉豈獨公之不幸哉嗚呼銘曰

允毅鄜公逢時之隆學古入官薦躋顯庸執法在朝為

名御史再陞外臺其行愈偉京尹堂堂百郡所瞻惟少
司馬戎律有嚴遂陟夏卿君子所重噫其逝矣云誰不
慟人道之大曰義與仁仁義不違何愧於天刻文墓碑
負以龜趾永永不亡庶其在此

禮部右侍郎諡文肅錢公神道碑

公諱幹字習禮吳越武肅王鏐之後初吳越歸宋子孫
皆顯仕其為吉州防禦使曰惟濟子昕遂家廬陵三傳
至貴和徙吉水諸源為望族曾祖以吉祖立志父好德

母赤岸陳氏皆以德義重鄉里公生而喜學父母兄弟
皆鍾愛凡所師友者見其文敏而思深且多出腹藁莫
不奇其才從學南昌訓導顏子明而卒業於翰林修撰
張伯穎永樂六年江西鄉試第一明年會試中第十時
車駕幸北京廷試不果由是從容京師間縱觀聖朝政
化之美聲明文物之盛四方萬國謳歌朝覲之會同而
才益進九年廷試取進士入翰林為庶吉士尋陞檢討
叅史職甲辰會試命公為同考八月仁宗皇帝即位一

新庶政陞翰林侍讀與知制誥洪熙元年賜勅褒贈父母及封其妻勅同修太宗皇帝實錄仁宗皇帝升遐宣宗皇帝正大位勅修仁宗實錄公亦與焉時有詔許焚黃公承命以往丙午促召還京偕太子少保金幼孜等入見命完修實錄二年春闈則命公為同考官三年戊申元夕賜文武近臣觀燈萬歲山賜宴公及文臣賦詩以進賜之鈔四年八月應天府鄉試奏請考官命公為之十二月朔是日霜寒甚上命光祿賜在廷文臣羊酒

以禦寒曰皇祖考在位每旦常有賜今朕多事忘之汝
勿忘五年兩朝實錄成賜金織襲衣銀幣考禮部會試
陞翰林侍讀學士蒙給誥命贈父以已官母與妻皆贈
宜人痛寵命之不生及也哭之過哀七年駕過史館有
作併賦招隱之歌以示近臣蓋是時天氣清明聖心悅
豫懷賢覽古悠然天趣之高發見於吟詠於此蓋可見
也八月考北京鄉試十年乙卯春宣宗皇帝晏駕令皇
帝即位二月上宣宗尊號賜白金秋九月詔修宣宗實

錄十二月賜文綺丙辰正月改元正統大臣建議開經筵詔可其奏公與為講官三月上臨軒策士公讀卷勞以羊酒賜宴於禮部戊午四月進宣宗實錄上御奉天門慰勞甚至賜白金文綺織金衣襲陞翰林學士賜宴於禮部八月應天府鄉試命公為考試官四年充廷試讀卷官六年考北京鄉試七年壬戌為行婚禮賜紗衣紗帽金相香帶等物九年甲子三月大新國學成上祇謁先聖躬行釋奠禮幸彝倫堂命祭酒司業以書易進

講從臣坐聽公與其列七月公上章乞致仕弗允且降
勅諭天下憲臣及縣令有難其任察舉以聞公舉所知
而人以為當十年乙丑禮部春試上復命為考官三月
進五倫書蒙賞賚冬十月欽陞禮部右侍郎公以老病
懇辭弗獲諭使就職朝廷稽古右文事多由禮部公夙
夜祗慄惟恐有弗稱上又命兼署吏部公益謹畏不自
寧求去益切詔許之公卿大夫餞送出都門皆有詩公
獨取歸去來辭長歌以自快人莫不以為榮而喜聖德

之厚也公孝友忠信篤於倫誼厚生送死君子稱之至
姻戚故舊亦無悖於理者在位三十餘年以文章議論
為士類所敬樂於教人學者亦樂從之遊典文衡者八
讀卷者二佳時暇日擇勝往遊長篇短章發於歌咏以
揚太平之盛美及老而歸願老之堂子孫侍教者十五
年凡所著述論思聯為大卷有應制集詞垣藁詞垣續
藁歸田藁藏於家後世傳焉天順四年九月嬰疾五年
四月益甚五月二十二日終於正寢春秋八十有九訃

聞上為之嗟悼命禮部賜祭工部為治祠墳諡曰文肅
配王氏繼娶曾氏皆有賢行子二長鸞停先卒次鳳躍
習舉子業女一人孫男某曾孫男某初公之歸即欲為
安樂窩得地於其里洲背山而營焉至是鳳躍以其親
戚高僉憲所述行狀請於予曰先考文行公知之且交
最久神道之碑非公孰宜為予老且病不得辭乃勉副
其意銘曰

洲背之山有崔者墳是誰所營武肅令孫惟此令孫克

勤帝載由唐而興日廣且大歸於有宋以德以仁衣冠
相傳有土有民天祚忠孝賢者相繼維時能來繫公是
視公之遊此旌旆于于山靈來瞻風卷雲舒植木有本
醴水有源公之本源人其式旃公每來歸子孫翼翼誦
詩讀書有永無斁惟公世家海內所聞政事文章亦煥
其羣我與為友式篤於義九十而終尚利後嗣公官三
品神道有碑我作銘詩百世之詒

奉天靖難推誠宣力武臣特進榮祿大夫柱國

太保寧陽侯追封濬國公諡武靖陳公神道碑

銘 李賢

永樂初靖難功臣不下數十人然克享祿位於悠久者
鮮矣惟太保寧陽侯陳公歷事五朝出藩入衛凡六十
餘年而以令終嗚呼盛哉公諱懋字舜卿鳳陽壽州人
高祖萬曾祖福三祖大一俱追封涇國公妣皆涇國夫
人父亨從太祖高皇帝定天下以功陞都指揮使洪武
三十二年從太宗文皇帝靖內難復以功進都督同知

卒贈奉天靖難推誠宣力武臣特進榮祿大夫柱國追
封涇國公諡襄敏母韓氏涇國夫人襄敏公三子長恭
嗣為都督同知次忠府軍前衛指揮使季即公也罷宇
宏遠識見超卓尤負膽氣工騎射年弱冠即從父領兵
為前行凡壩上廣昌蔚州大同白溝濟南之戰與父同
功又禦敵於單橋藁城西寨東平固鎮小河戰尤力累
陞右都督永樂初論功行賞進封奉天翊衛宣力武臣
特進榮祿大夫柱國寧陽伯食祿壹千石子孫世襲賜

誥券賚予甚厚六年受詔佩征西將軍印總兵鎮守寧
夏賜寶鏐白粳牛羊以為戒嚴之費公至鎮號令一新
凡元人降附者親撫綏之務得其歡心乃已七年選精
兵自將大敗敵於境外由是殘孽遠遁邊塵為之一清
捷聞加封奉天靖難推誠宣力武臣特進榮祿大夫柱
國寧陽侯食祿一千三百石子孫世襲復賜誥券及貂
蟬冠服錦綺寶鏐八年春上親征北寇公將左掖兵十
一年冬還鎮十二年春上復親征公仍將左軍俘馘甚

衆明年還鎮十四年夏有報北酋瑪哈穆特死者公未之
信曰是欲懈我邊備也即申飭諸將固守已而寇衆果
來見有備而退二十年春上復北征公率所部兵以從
還京賜玉帶金綺龍衣且聞公有女賢淑禮聘入宮冊
封麗妃尋命歸寧父母賚予駢蕃當世無與為比二十
一年詔公統陝西寧夏甘肅三鎮兵出勦叛寇公率衆
直抵賀蘭山擣其巢穴盡收其酋長額森托噶部落及
其牛馬駝羊數萬凱還上大悅寵賚有加二十二年復

隨上北征師還以公為殿至京遂領前軍都督府事仁
宗皇帝登極以公勲戚有勞加太保復官其長子昭為
勲衛宣宗皇帝臨御待公尤厚樂安州之平公領京營
兵衛上有功還有金帛人口之賜二年復鎮寧夏三年
春奏徙靈州城以便防守四年春得玄白二兔以進上
賜璽書獎諭兼有玉帶龍衣馬圖之賚六年還京十年
命佩平羌將軍印移鎮甘肅正統改元今上皇帝嗣位
念公勲戚之舊召還奉朝請十三年冬福建民鄧茂七

作亂偽稱閩王勢甚猖獗上曰此賊非老將不能平特

命公率師往討之至浙江有欲分兵先守海口者公曰

如此是絕其生路則為死寇矣不從明年春師次建寧

有欲屠沙尤二縣者公曰如此則益堅賊心矣乃下令

諭之俾各復業能斬賊首者官賞與王師同於是降者

日衆公曰賊勢已孤無能為也乃五路進兵一鼓而收

之凱還賞勞加等命領中軍都督府事尋兼領宗人府

事景泰中加太子太師天順改元皇帝復位恩遇益隆

固辭宮師許之六年春忽得疾踰秋不能起上言臣老死不足恨惟陛下以生民為念任賢用能以圖太平之治則國家幸甚上覽之惻然曰看卿所奏足見忠誠宜尚加調治以副朕懷久之醫藥弗效遂薨時天順癸未七月十六日也距生洪武己未二月九日享年八十有五訃聞上震悼輟視朝一日追封濬國公諡曰武靖遣官諭祭加賻及營葬事東宮及諸王亦各致祭公偉觀修髯語音洪亮胸懷磊落敬禮文士雖位極人臣未嘗

妄自尊大而南征北伐口不言功當為中興名將稱首
配嚴氏封寧陽侯夫人早卒子男六人長即昭次曰福
寧俱早卒次曰晟為勲衛次曰潤次曰瑛次曰昂女五
人長適應城伯孫傑次即恭順榮穆麗妃次適東勝右
衛指揮使張昭次適府軍左衛指揮使張輪次適都督
同知馬良潤等卜以是歲某月某日與嚴夫人合葬於
都城西香山之原銘曰

壽有陳宗父子傑特涇公濬公後先開國文皇靖難孰

多勲勞涇公輔之首秉節旄奮武桓桓所向披靡大事
垂成星殞於壘濬公承之以篤世忠鼓勇前馳涇公是
同躍馬揮戈到處蹀血乃伯乃侯成此茂烈金符虎節
屢鎮邊陲于征于狩無遠不隨閩寇勦東南震恐濬
公征之遂輯其衆巍巍勲戚歷事五朝龍衣玉帶惟帝
之褒壽嘏既純允顯六紀容與承平宿將無幾煌煌
冊賁此令終生死哀榮孰如濬公西山嵯峨佳城在側
史臣勒銘千載輝赫

恭順侯追封涼國公諡忠壯吳公神道碑銘

天順辛巳逆賊曹欽謀為不軌潛俟七月二日早朝入
內為亂恭順侯吳公先於是夜一鼓聞之即與其弟廣
義伯琮約總兵懷寧伯孫鏜走詣長安門告變於是禁
門不啟賊計遂窮舉火燒禁門公等率兵勦殺奮不顧
身賊雖誅滅公已捐軀矣嗚呼先機告變公之忠也殺
賊喪元公之勇也然則逆賊之敗豈非公之功乎皇上
聞公之歿哀悼殊深輟視朝一日追封涼國公諡忠壯

凡秘器諭祭賻儀之類悉從厚典復命有司為營塚壙以安葬之蓋痛念勲戚之臣為社稷而死故報功之典倍蓰尋常也既而琮詣予泣且告曰先兄不幸歿於鋒鏑茲欲立石墓前以白於世非先生之文不可辭弗獲按通政司叅議趙君昂之狀公諱瑾字廷璋其先西涼人祖諱允誠永樂中累以戰功封恭順伯父諱克忠嗣伯爵洪熙初以戚里恩進封恭順侯正統甲子以征北功加太子太保己巳秋禦寇北邊力戰而死追封郕國

公諡壯勇母楊氏封邠國夫人叔父克勤官至左軍都督府左都督亦同兄歿於陣追封遵化伯諡僖敏公生而英銳襟度爽闊親賢好善未嘗以門第驕人以故搢紳士大夫樂與之游相與議論古今講說道義而公頗能識其旨趣尤閑武藝精騎射方其父叔禦寇之際公亦在陣中發矢射寇洎父叔矢盡而亡公始就執其酋長念公忠義之後釋之乃還京遂嗣父爵天順改元皇上復位公以勲戚隨侍應對稱旨自是日備顧問賚予

甚厚尋命理左軍都督府事公益感激夙夜效勤一旦
遭變委身則其允蹈忠義視乃父乃叔為無愧矣公生
於永樂癸巳十二月一日享年四十有九配李氏故會
寧伯之女有淑行封侯夫人生子男二長曰鑑次曰鏞
次曰錫女一適指揮使劉玉琮嗣廣義伯遵化公之子
卜以是年八月某日葬公於順天府房山縣之新莊從
先兆也銘曰

世祿之家忠義無幾有若吳門展也無比彼美忠壯虎

視耽耽遵化之姪邠公之男忠以捐軀壯以禦侮相繼
如歸光照中土飭終追榮惟帝之恩匪帝之私惟以報
勲聞矣泉宮西山之麓秘器旅陳穹碑載陸仁者有後
公則成仁銘以貞之何千萬春

禮部尚書致仕贈太保諡忠安胡公神道碑銘
我朝名公鉅卿聰明特達者多矣若器識宏遠福壽隆
長惟武進胡公一人嗚呼休哉公諱湊字源潔別號潔
菴其先淮安宿遷人有諱藩者仕劉宋為太子左衛將

軍遷豫章數傳至諱誠者仕唐為侍御史子常州刺史
瓊生特因家於常遂為武進人特四世孫曰宿仕宋為
樞密副使宿十一世孫曰中立為常州制置中立生昭
公之高祖也會祖庸仕元為江浙儒學提舉祖禎為常
州路醫學錄考宗仁隱居不仕皆以公貴贈光祿大夫
少傅兼太子太師禮部尚書曾祖妣章氏祖妣徐氏妣
李氏皆贈一品夫人公生而髮白彌月方黑母夢一僧
持花以遺之覺而生公居數日有僧至家索觀公見僧

即笑僧曰此吾師天池高僧後身也命我求見以笑為誌果然聞者咸驚異之公自幼端重不好嬉戲弱冠入邑庠洪武中領鄉薦登庚辰進士第授兵科給事中尋遷右給事中公勤識大體士林譽之太宗文皇帝入正大統公供職如舊永樂改元秋以奏對稱旨陞戶科都給事中丁亥上察近侍中惟公忠實可託遂命公巡遊天下以訪異人為名實察人心向背時御製性理大全為善陰隲孝順事實書成俾公以此勸勵天下以故雖

窮鄉下邑軌跡無不到在湖廣間最久丙申秋還朝丁
內艱乞終制不允尋進禮部左侍郎明年往巡江浙諸
州授嘉議大夫癸卯復自均襄還朝時車駕親征北寇
駐蹕宣府公馳謁行在所上卧不出聞公至喜而起且
慰勞之曰卿驅馳良苦賜坐與語凡所歷山川道里郡
邑豐嗇民情休戚以至所聞所見保國安民之事悉為
陳說上欣然納之向所疑慮者至是皆釋比退漏下四
鼓先是仁宗皇帝為太子監國時有飛語上聞文廟屬

公往察之公至以所見七事皆誠敬孝謹密疏以聞上覽之大悅自是不復疑仁宗嗣位特賜誥命授正議大夫資治尹已而聞公曾有密疏疑之乃轉太子賓客兼國子祭酒之官南京未幾閱章奏見公所上密疏深嘉其忠方議重用之而龍馭上賓矣宣宗皇帝即位復禮部左侍郎兼職如故洪熙乙巳冬公自南京來朝上素重公及入見顧問良久即留任行在禮部事宣德改元春進尚書是歲秋漢王謀叛事覺公贊上親征事平公

受賞賚甚厚復給叛者家屬四人丁未賜誥命授資善

大夫復賜近第一區於長安右門外給閭者二人戊申

上嘉公忠勤特賜銀章四其二曰文恭世家曰清和恭

靜蓋嘉羨褒美之也尋以公生辰賜宴於其第秋八月

公扈從巡邊至會州而還己酉命兼詹事府事夏五月

復扈從北巡時常民有豪橫者既抵於法悉以田宅賜

公辛亥命兼行在戶部事聖節御製詩一章賜公及蹇

忠定楊文貞文敏三公且曰朕茂膺天眷惟爾四人贊

翼之功因賜宴盡醉而罷新建禮部成命光祿設宴勲
戚公卿皆往賀公公以為盛事立石廳事之右倚任益
隆每燕見上虛心問曰卿有何言得其章奏即施行之
時有芝產於公署人以為公和氣所召今上皇帝踐祚
亦惟圖任舊人待公尤厚凡軍國重務皆與聞加授資
德大夫正治上卿每考績必有賚予甲子以年至七十
上章乞致仕上以公精力未衰慰勉留之己巳上親征
北寇命公留守京師秋八月進太子太傅階榮祿大夫

景泰初賜誥命辛未春公因災異數見乞放免以回天
意不許尋進少傅壬申兼太子太師二俸兼支公固辭
一俸癸酉復賜誥命進階光祿大夫自後每歲引年乞
歸皆不許丙子復因災變乞賜罷黜亦不許時公年八
十二忽疾作艱於步履明年皇上復位公喜不自勝扶
疾入朝而筋力不可強矣遂乞謝事且辭師傅二職上
方重用耆舊憫其老皆從之陞辭賜白金寶鏐金織襲
衣給驛舟以歸復賜璽書有卿宅心允臧處事惟慎雖

經變故無改厥常之諭歸之日鄉人老稚聚觀者以億萬計公陳所受賜於堂感激泣下遣冢子長寧詣闕申謝上念公歷事累朝遂官長寧為錦衣衛世襲鎮撫俾歸終養公之弟克恭克寧克誠時年皆七十餘蒼顏白髮燕樂於一堂遂扁曰壽愷優游桑梓者七年疾復作召諸子前曰爾輩圖報國恩勿墜家聲遂瞑目而逝天順七年八月八日也享年八十有九終之夕常州守卓天錫夢公來辭已而聞終大以為異計聞上為之震悼

贈太保諡忠安遣官諭祭於其家復令有司營葬事恩榮始終世莫與比公為人平易寬和廉靜寡慾自奉淡薄起居有常居官敬慎一毫不苟歷事列聖無纖毫過舉蔚然為一代名臣立朝幾六十年薦拔士類甚多十知春闈貢舉天下之士盡出其門平居未嘗疾言遽色雖庸夫孺子亦知其為長者暇則手不釋卷喜為詩文晚年譽望益尊其酬應愈劇曾不厭倦所著有芝軒集若干卷又嘗輯錄醫藥經驗者曰衛生易簡方經進又

有律身規鑑俱行於世公配范氏早卒累贈夫人繼張氏累封夫人子男四人長曰鉞即長寧居母喪廬墓有司聞於朝旌其門曰孝子次曰鈇以武舉得官沒於王事次曰礪錦衣衛指揮僉事次曰銅女三人長贅林玘次適成國公朱儀次適陽武侯薛琮孫男一人曾孫男一人銘曰

大明盛時有臣胡公從容其間以篤其忠始為夕郎乃教胄子輿論攸歸多士咸喜作賓春宮遂長春官列聖

倚之四海又安國之老成進位師傅溫恭維人翊我皇
度公在朝廷六十春秋祿位優游莫之匹休公身雖亡
中有不死懿行崇功昭彼信史皇恤耆英曠典是承隧
道有碑儒臣刻銘

吏部尚書致仕贈太保諡文端王公神道碑銘
公諱直字行儉別號抑菴系出瑯琊晉太傅導之後也
導輔東晉遂家金陵後數世有宗文者仕唐為吉州刺
史因家吉州又數世孫贄仕宋為戶部侍郎徙居泰和

代有顯人曾祖以道祖子興隱居不仕父伯貞仕國朝
為肇慶知府俱以公貴累贈少傅兼太子太師吏部尚
書妣皆贈一品夫人公早喪母而父以事去賴祖母李
夫人撫育自幼端重異於常兒家貧力薄刻苦讀書永
樂改元遂領鄉薦明年登進士第時太宗皇帝篤意古
學詔選進士曾榮等二十八人為翰林庶吉士俾讀中
秘書冀成遠大之器公在選中感激奮志不數年文辭
追古作者上以公卓越諸士召入內閣凡機密之政屬

執筆焉尋授翰林修撰車駕巡幸北京仁宗為皇太子
監國留務之重選任尤嚴時翰林則留黃淮楊士奇與
公三人輔導公夙夜勤慎不懈中外咸倚重之及再幸
北京公在扈從遂與修太祖實錄未成以憂去服闋仍
入翰林陞侍讀仁宗即位進侍讀學士宣宗為皇太子
慎選宮僚首陞公右春坊右庶子仍兼侍讀學士凡經
筵講義及文武羣臣誥勅皆以屬公又兼記注至於聖
政聖訓之當書者皆錄之以備纂述進階奉議大夫宣

宗即位與修兩朝實錄成進詹事府少詹事仍兼侍讀
學士有白金彩幣襲衣寶鏐之賚進階中順大夫今上
嗣位詔修先朝實錄以公總裁書成進禮部左侍郎仍
兼學士賞賚如前久之以禮部缺人命公出涖部事宗
伯胡公大喜闔部之政悉付之公處之裕然若素習者
吏部尚書郭璉去位詔以公代之命下士類皆悅進階
資善大夫歷再歲有無賴不得志者以選撥事嫁禍於
公給舍御史交章論列乃直公誣加授資德大夫正治

上卿正統己巳秋元人犯邊車駕欲親征公獨以為不可率廷臣上疏止之不獲特命公留守京師加太子太保兼吏部尚書尋進階榮祿大夫景泰初進少傅壬申兼太子太師進階光祿大夫公累疏求退不允天順改元皇上復位圖任舊人公艱於步履不能朝謁懇乞休致并辭師傅二職詔特許之賜以璽書有忠清之操簡於朕懷之語復出白金文綺寶鏐賜之給驛舟以歸公方面修髯器宇宏偉望之若神仙中人天性嚴重寡言

笑居家儼然及至接人和氣可掬學富才敏詩文清緻
四方求者接踵屢典春闈文衡得人最盛在翰林三十
餘年恭勤不怠如一日與王文安公齊名時稱二王又
以居第在東稱東王先生士類莫不拭目海內想聞其
風采及位冢宰益加廉慎時方面官罷廷臣薦舉專屬
吏部公益留意人才委任部屬凡御史出巡歸者必令
報其高下以備拔用自是四方多號得人奔競之風為
之一息居第隘陋曾不屑意一切世味安於淡薄朝廷

重公之德每優禮之免其朝謁及退休居家杜門不出
日課諸孫讀書而已所著有抑菴集若干卷行於世天
順六年九月二十三日以疾終於正寢享年八十有四
訃聞上為之悼惜特贈太保謚文端遣官諭祭於其家
復令有司營葬事公配陳氏累封一品夫人先公二年
卒子男四人長曰積翰林檢討居母憂以卒次曰稹次
曰穆次曰桐女三人長適梁相次適蕭稹次適袁傑孫
男十人曾孫男七人稹等卜以天順七年正月六日葬

於邑之信實鄉高坪之原乃以公所為墓誌示賢請銘
其神道賢從公遊最久公未嘗待以屬吏又引之同升
平生之知未有過於公者謹次第其事而系之以銘銘
曰

國之明昌繫彼才賢有一挺生繫豈偶然侃侃王公天
賦其秀有聲煜然大江之右鑾坡鳳閣容與翱翔惟學
之昌惟譽之芳遂秉鈞衡不倚不忒百司庶府位稱其
德位稱其德又我烝民列聖汝嘉保傅師臣公之旋歸

既祿且壽國藉著龜士仰山斗公之云亡軫我聖衷節
惠二名錫命三公有美哀榮無然愧忤銘在豐碑元老
之墓

明文衡卷七十八

欽定四庫全書薈要卷二萬二百三十二

集部

明文衡卷七十九

明程敏政編

神道碑

榮祿大夫太子太保吏部尚書贈特進光祿大

夫太保諡忠肅王公神道碑

彭時

公諱翱字九臯姓王氏其先世家灤州自公之父避元季兵亂徙居滄州之鹽山故今為鹽山人公生有異徵

氣清質秀甫十歲能讀書父即勉以仕進克自勤勵學
遂有成永樂乙未登陳循榜進士第二甲第一名改庶
吉士甲辰授大理寺左持正因註誤左遷行人宣德丙
午用廬陵楊文貞薦陞行在山東道監察御史當是時
任風紀者多事矯激惟公謹重達大體上下賢之乙卯
陞都察院右僉都御史正統丙辰奉勅鎮守江西政不
苛刻吏民畏愛未幾往浙江除土豪理鹽法能聲大著
已未四川松潘番賊為患命將往征以公叅贊軍務公

欲懷以恩信有來降者即以所賜白金寶楮易牛酒犒之番酋商巴感悅率生番來歸受約束者一十八寨邊境以寧辛酉出鎮陝西飭兵備壬戌往遼東提督軍務時遼東守將屢失機朝廷以為特簡任公且授以便宜之權公至守將以下庭叅公詰責玩寇失機故將斬之得其再三哀請乃已於是官軍咸股慄莫敢不用命逾月躬出巡邊治障塞嚴斥候仍簡閱戍卒更老弱賑貧窮配鰥寡俾成室家人人感激其治訴訟專行贖罪法

雖人命亦然曰償命無益死者之家而財或足以濟其
用故行之不疑有指揮孫璟者因漏關鞭戍卒至死其
妻女哭之相繼死他卒被鞭者訴璟殺一家三人公判
曰甲死以罪妻女死於夫非殺也其令璟償葬埋費璟
後為將有名非公優容不及此癸亥陞左副都御史丁
卯率師出境破敵有功陞右都御史己巳陞左都御史
是年秋北酋額森分衆寇廣寧公下令堅壁清野以困
之賊乃遁去公在遼東十數年勤訓練廣儲蓄食足兵

強為諸邊最其拔用將校如施聚焦禮輩皆以勇畧知名亦非他邊所有也綏懷東方諸都恩威兩盡往來朝貢者無不惕威而感德景泰壬申召理都察院事尋加太子太保會廣東西賊寇擾攘兩鎮將官互相觀望不即捕朝廷命公總督兩廣軍務公至推誠撫諭蠻夷向化者多思思知府岑瑛土官也屢有勞效或疑其反側公令瑛領兵屯桂林聽調人言乃息其他土官有爭職者公度勢量情予奪得宜人心帖服癸酉少傅王文端

公以清德雅望居吏部年且老矣朝廷思得剛明果斷者以濟之乃召公還命以太子太保兼吏部尚書士夫以得人相慶乙亥公年踰七十乞致仕不允已而乞歸展省又不允命有司為公起第於縣郭西蓋以慰安其心也公掌銓衡子子持公道進退人才必察其實而於抑僥倖杜請託尤嚴選法為之一清天順丁丑英宗復位罷舊宮僚公上疏乞致仕南陽李文達公言於上曰王翱廉謹老成吏部非此人不可乃不聽其去任用益

篤已而文達被讒黜公力言其淳實可用以故文達復
被寵任焉當是時上眷遇公加隆特官其子國子生竚
為錦衣衛副千戶而賞賚以金玉束帶錦繡衣服銀幣
玩器等物歲無虛月屢召與近臣同遊西苑南城及扈
從獵近郊燕賜優渥一時擢用廷臣惟公言聽有出他
人薦者亦必待公而後決也每召見便殿訪問從容呼
以老王而不名其見敬禮如此辛巳秋加太子少保甲
申今上嗣位賜銀五十兩鈔五千緡是冬命遇雨雪免

朝叅乙酉春復加太子太保公年雖高精力如少壯人然無歲不引年致仕皆蒙優詞褒答勉留不果行丁亥公有疾上命中貴挾御醫往視并致白粢上尊之賜七月疾益篤其請益懇切上不得已允之居數日遣中貴齎賜勅諭并金織衣一襲銀三十兩鈔三千緡時已不能就道至十一月六日卒於京邸距其生洪武甲子二月十二日享年八十有四上聞訃嗟悼贈特進光祿大夫太保謚忠肅遣官諭祭營墳給驛送還其鄉以卒之

明年五月初二日葬於帽架圈之原曾祖進昌祖大老
父得林俱贈榮祿大夫太子太保吏部尚書曾祖妣徐
祖妣劉妣張俱夫人配宋氏先公二十三年卒累贈夫
人次張氏亦先卒子男一即竚也女一適河南叅政賈
傑孫男二長田次隣國子生女二曾孫男女二公天資
仁厚操履端方居官泣政謹繩墨蹈規矩一毫不苟且
其待人外若毅而中實寬和好惡所加善者悅而惡者
不怨論事語簡而質是是非非確乎其不可易持己廉

潔無私而自奉甚儉薄自初仕勤勞於外與晚處廟堂
皆然未嘗以壯年異其心蓋年愈高而志愈勤守愈約
忠君愛國之誠愈篤而無懈真厚德君子也跡其所以
享盛福榮名無愧於古之大臣者其在此歟太宗伯姚
公狀公行詳且實矣公子竚欲刻石置於神道請予文
之予素敬重公苟可以焯德信後義奚容辭惜乎文不
足以既其實也銘曰

有美王氏世居於灤積善秉義隱處是安避兵四山遂

定厥家再傳而顯揭德振華其振伊何自公特起降誕
之祥虹光兆異乃勵儒業乃第科名薦歷顯位駿望鏗
鉤公出四方憲度清肅弊革利興兵民攸服其在中朝
恪秉銓衡賢才彙進治道乃成公何能然惟德之進惟
公惟廉惟勤惟慎公以接物繩直準平廉以律己玉潔
氷清勤以涖事夜寐夙興慎以存心晨惕夕兢祇事五
朝始終若一為國元老為士矜式官躋一品壽踰八旬
推今較古如公幾人公今往矣疇不嗟悼匪私於公惟

德是好渤海故郡高墳我我於乎忠肅千載不磨

姚文敏公神道碑

惟姚氏系出有虞其先家汴梁宋南渡徙居桐廬世傳
詩禮多知名士而未甚貴顯貴顯自公始公諱夔字大
章損菴其別號也生一歲而孤性資穎異克志於學十
三遊邑庠博通經史為文雄健有奇氣正統戊午以春
秋舉浙江鄉試第一會試辭乙榜入太學祭酒李公時
勉司業趙公琬一見器重之少保楊公溥聞名且遣子

壻從學而公不自滿復遊錙忠愍公之門請益士大夫
莫不高其志壬戌會試中第一與從弟龍俱登進士人
榮耀焉癸亥擢吏科給事中首以修德舉賢選風憲立
諡法等八事為言多見採納甲子夏旱奉命祀北鎮雨
應期至丙寅持節冊封晉府徐溝等王未還而母夫人
卒公以不及奉湯藥為恨號慟幾絕葬祭一以禮已已
服闋復舊任是秋英廟北狩國勢危疑大臣勸進邸王
議未決詢諸六科公曰社稷大計為大臣者當任之而

詢諸小官何耶事乃定十月敵騎犯京城禁兵出戰未

大捷公請遣勅召邊將楊洪等領勁騎入援寇聞一夕

遁去景泰庚午廷臣薦公才堪大任陞南京刑部右侍

郎振舉廢墜刑獄以清壬申改南京禮部奉使雲南考

察官吏癸酉還朝留任禮部丁丑正月景泰不豫尚書

胡公澂在告公強之出率文武羣臣問安且請復立皇

太子正位東宮䟽成未上而英廟已從石亨等請出復

位矣亨因挾私弄權軒輊大臣而進退之調公南京刑

部已而有言公才者英廟悟驛召至京轉禮部左侍郎
賜二品服戊寅調吏部時王公翺為冢宰選用人才資
公為多癸未遷禮部尚書先是典禮者未愜人望公任
之奏對從容儀度閒雅英廟喜曰禮官真得人矣甲申
今上嗣位公贊襄大禮中節合宜首開經筵命公侍列
有白金文綺寶楮之賜乙酉成化紀元上畊籍田幸太
學悉從公請而行禮成宴賜有加公嘗云輔政當謹諸
始丙戌秋率羣臣上封事有思艱難崇節儉謹名爵戒

逸欲之言上欣然嘉納勉諭甚至丁亥正月賜金織麒麟文綺戊子復率羣臣上疏言皇上春秋鼎盛而震位尚虛宜均愛六宮以繁子嗣服食言動宜悉遵祖宗舊制言激切有感動意是秋慈懿皇太后崩卜異葬內閣執不可公率羣臣覆奏詞嚴而義正於是合葬祔廟之禮以成公在禮部所知貢舉僥倖止息凡遇災異必引咎辭職䟽上輒蒙慰留復乃乞祭先塋上曰卿老成當朝夕輔朕未可言私於是衆知朝廷倚重公者至矣尋

轉吏部尚書實己丑六月也公釐正銓法務愜輿論品藻人物必得其情至於方面轉遷亦必以序有欲撓之者卒不變辛卯秋通前秩滿九載加太子少保遣中官賜羊酒寶楮以示獎勞是冬彗出軒轅公上疏反覆諷諫冀有感悟壬辰南方大風雨水溢公疏言自前歲彗星示變以來四方漸覺多故自古禍亂常起於灾傷饑饉之餘毋謂天道姑息有象無應只圖因循便安於目前也因再上疏乞歸田不允憂形於色疾遂作上命太

醫閭朝夕診視仍遣中官賜羊酒米蔬臨問比卒上震悼
賜賻鈔萬緡遣禮部尚書鄒幹諭祭贈榮祿大夫少保
諡文敏命工部造墳兵部具舟歸其喪所以賁終之典
厚矣公丰神秀朗氣度宏偉言論侃侃達大體居官涖
政精敏踰人拔擢人才無間新故有以嫌疑騰謗者公
不與辯亦不為之變節隱然如泰山喬嶽不可動搖立
朝三十餘年憂國憫民恒存念慮事有可為必勇為之
惟恐已後人先每廷議大政大事正色昌言人皆悅服

一時大臣詞氣慷慨才識高邁未有出公右者識者謂
公可屬大事如周勃善應變成務如姚崇世以為知言
公所為文豪宕富瞻似其為人所存藟蘖堆稿一十卷
其四書本經義學者式之公生永樂甲午十二月十七
日卒成化癸巳二月九日享年六十曾祖鼎祖伯華父
惟善有隱德以公貴始贈父徵仕郎吏科給事中後累
贈父及祖俱資政大夫禮部尚書祖妣楊妣申屠累贈
夫人配王氏內助賢能累封夫人子男三璧甲申進士

兵部郎中璽國子生瑩女四一適鄉貢士吳春先卒一
適國子生陸竣餘未行其長男女四人俱王出幼者俱
側室金出孫男三敏敬敬女二璧扶柩南還以卒之明
年閏六月二十五日葬於邑金牛山之原立石神道來
徵予文予以疾固辭而請益堅顧予與公同朝久相知
為最深自公之逝予悼惜尤至豈可終無一言以副孝
子之心哉乃為采撫誌狀序次如右繫之銘曰

山川間氣生名賢才高意廣氣浩然讀書下筆文湧泉

科名屢占多士先拜官禁近拱御筵羽儀燦爛孤鳳騫
時乎景泰天順間兩京三品看屢遷雲龍風虎會當年
文昌高朗凌台躔仰輔天皇司化權四方英俊歸陶甄
公於是時任調元溜深負重如山淵忠言讜論累百篇
致君欲過堯舜前心勤事左思歸田終情未遂殊憂煎
翻然長往不少延六十甲子纔周天四海蒼生嗟棄捐
百身莫贖有淚漣我皇聞訃誠哀憐贈官錫諡恩禮全
英靈歸葬桐江塿金牛山色開雲煙隧碑魏我澤且堅

神龜鼎屬螭盤旋焯德有辭可細鐫芳名耿耿百世傳
侍郎葉文莊公神道碑

公諱盛字與中姓葉世為吳郡崑山人五世祖秀實惇
重好義元季有暴僧聚徒事焚劫為鄉里害秀實即圖
上其事於官捕斬之時稱為葉義士曾祖茂林妣朱氏
祖明贈通議大夫吏部右侍郎妣郭氏贈淑人考春封
兵科都給事中贈山西右叅政加贈通議大夫吏部右
侍郎前母湯母陳俱贈淑人繼母沈封太淑人公天資

穎異自少博學強記下筆驚人同邑知名士張和見其所業文曰此其志不可量因勸游邑庠遂駸駸有成矣正統十年舉進士授兵科給事中毅然以言責自任十四年英皇北狩郕王監國公率同列劾將臣扈從者失律敗事請誅夷之以謝天下然後選將練兵以復不共戴天之讐興師問罪以除大逆不庭之賊如此則大綱以正大義以明而聖駕之旋軫可期矣聞者壯之九月監國即位頒賞廷臣公以時艱辭不許十月京城戒嚴

公請罷內府軍匠悉遣征操及敵騎近城又請令有司
熟糧料以給戰士遣散卒迎取軍器於天津以張外援
四三日間凡七八䟽悉合機宜寇既退公言賞功罰罪
治天下要務今日之賞罰既行他日之勸懲攸繫賞罰
明信則人人力於事功恥無不雪讐無不復矣今効勞
如孫鏜死事如謝澤韓青皆當賞以示勸其他守闕不
嚴赴難不力者皆當罰以示懲從之十一月陞都給事
中時邊境未寧大臣有奏留邊將守京師者公言今日

之事邊關為急往者獨石馬營不棄則六師何以陷土
木紫荆白羊不破則敵騎何以薄都城即此而觀邊關
不固則京師雖守不過僅保九門無事而已其如陵寢
何其如郊廟壇壝何其如田里之民荼毒何宜急遣固
守宣府居庸為便已而河南陳州流民扇動命公往視
公即兼程以進除貪虐賑饑寒威惠並行民用安輯景
泰元年春還復上言京城為天下根本而八府旱蝗相
仍加以北寇侵擾民不聊生乞議寬恤俾安生理不然

臣不能不為社稷憂也八月北人送駕還京將入關矣
有隱名具帖言迎復事者大臣見之顧忌不敢舉公曰
此野人無情之言達於上感動必矣或沮以匿名書公
不顧具疏言之有旨令尚書胡濙封進帖雖留中而正
論有不泯焉是冬公以北寇南蠻為患不已上疏請令
中外文武要職各陳安邊濟時之策二年六月天象示
異公又條陳弭災防患十二事以上及聞禁中頗事遊
畋又請舉行祖宗午朝故事公當多事之秋遇事輒形

於䟽每䟽不下百千言而大要則以扶忠直抑姦佞恤

生民禦外患為主其有裨於時政為多三年遷山西布

政司右叅政監督宣府糧餉尋命協贊獨石等處軍務

先是獨石馬營八城遇寇失守殘毀未復公列其利害

可興革者為八條以進次第罷行之八城既復乃立社

學以教子弟置醫藥以濟疾病立義塚以瘞死亡設暖

鋪以便行旅均䟽圃以給將士制度品式纖悉備具而

又請官銀五千兩買牛千餘頭摘戍卒不任戰者俾事

耕稼歲課餘糧於官凡軍中買馬除器勞功恤貧諸費皆於是乎取給自是邊人歡洽歲亦屢登有嘉禾同穎之祥七年冬以外艱去八城之人如失父母連章乞留而公固辭不可天順二年英宗皇帝嘉其能驛召至京面加獎諭尋擢都察院右僉都御史巡撫兩廣公乞終制不允至廣興利革弊尤盡厥心舊例廣東鹽課不出境歲久鹽積商困往往賂守關津者越過廣西市利公以為聽之則法壞而利歸於商禁之則商滯而利歸於

關津乃請許鹽商計鹽多寡入米餉邊而後出境於是
公私兩利焉時廣西流賊多入廣東為害而兩廣守將
顏頤自異是以討賊不成功公請革兩廣正將立總鎮
於梧州居中調度則賊可平矣衆韙其策而不果行公
不得已請益兵英宗乃命都督顏彪率兵赴之公與彪
協議破賊砦八百所擒斬數萬人而還或又以殺降謗
之而不知實積年反復之賊也天順八年令上嗣位陞
公左僉都御史巡撫宣府修復官牛官田之法墾田益

廣積糧益多以其餘歲易補戰馬千八百餘匹其屯堡
廢缺者力修築之不數月完七百餘所兵民始雖怨之
既而恃以無恐乃欣戴焉在宣府屢有建白且請行養
老之令於邊褒恤已往賢臣為方來勸上嘉納之成化
三年陞禮部右侍郎五年改任吏部是冬持節封藩府
稷山王六年畿內大饑命公巡視真定保定二府賑恤
貧困綏輯流亡既還復命賑濟京民之饑者全活甚衆
八年北寇出沒河套為西邊患有言增兵守險者有言

大舉搜套驅出河外沿河築城堡抵東勝徙民耕守其中者公受命往議方略奏言搜河套復東勝此皆事勢所難不敢妄意惟增兵守險可為遠圖宜令守臣剷削邊牆增築城堡收新軍以實邊選土兵以助守此不但可責近效而亦足為長便也上是其言九年轉左侍郎公自入佐部政每議禮用人從容贊決其間僚長敬信司屬悅服焉至若事非部分而關當時利害繫生民休戚者遇諸卿必相辨正因而助益者不少一日坐後堂

署事忽疾作不能言輿歸西第而卒實甲午三月八日也享年五十有五上聞深悼惜之賜賻鈔三千緡諡為文莊遣官諭祭營葬以明年二月十七日葬於邑之積善鄉湓瀆之原公為人溫雅簡重崇道誼尚名節言動思跂古人居家惇孝友涖官清慎勤恪設施不苟與僚友論事不激不隨而言色自若其取人先行檢而後才藝然存心寬厚終不及人之過惡所寓門無雜客公退手不釋卷考古辨疑殆忘寢食而於世俗聲色財利之

好澹然不以經心平生為文師歐陽而功業自期於韓

范以范公為鄉先正尤景慕焉惜乎大用未究而卒所

著詩文奏議總若干卷藏於家公凡再娶先金氏贈淑

人繼耿氏刑部尚書耿清惠公之女封淑人子男一晨

補國子生娶副使張和女女三人一適貢士虞臣一許

夏景澄一尚幼公之卒也晨不在側冢宰尹公旻率僚

屬經紀其喪事既又狀公行畀晨晨奉以徵予文且曰

先父雅愛先生言幸勿辭而公內弟司業耿君裕又申

其意以請因撫狀言著其概系之銘曰


古稱才難今世尚然彼長此短用各一偏優於政矣其
文叵傳文或工矣政譽弗宣達觀於世百靡一全而公
兼之寧不為賢惟公問學有本有原公之操履金石其
堅清文達識自視無前檢身約己猶恐或愆駁歷中外
逾三十年忠君愛民心實勤拳言惟婉切用適方圓惠
浹於民威行於邊緬懷鄉衮我其隨肩謀謨事業期著
後先何志之遠而去之遄位不滿德繫命於天墓門有

碑德烈是鐫於乎文莊百世不謬

明文衡卷七十九

謹案卷七十八第十一頁後一行瑪哈穆特舊作馬
哈木今改 後七行額森托噶舊作也先土干
今改後放此

[illegible]



總校官庶吉士臣張能照
校對官編修臣閔懋大
膳錄監生臣楊仁基

欽定四庫全書薈要

集部

明文衡卷八十一

八十一



詳校官候選知縣臣吳國華

欽定四庫全書薈要卷二萬二百三十三

集部

明文衡卷八十


明程敏政編

墓碑

東丘郡侯花公墓碑

宋濂

皇上渡江之六年庚子夏閏五月癸酉偽漢主陳友諒以舟師入寇圍太平行樞密院判官花公率麾下三千餘人結陣迎戰三日賊不得入乙亥城中乏食公士馬



儻城陷賊縛公急公怒奮身大呼縛盡解起奪守者刀
殺五六人罵曰虜非吾主敵也曷不趣降賊怒碎公首
縛於舟檣衆射之公至死罵賊不少變已而賊犯龍江
上命諸將力戰賊敗去後五年甲辰上即吳王位追封
公東丘郡侯又十六年其子僉水軍左衛指揮司事煒
泣曰先公沒今二十年無文銘于神道竊恐忠烈不白
於後世敢請惟公勲業始卒宜載國史余嘗待罪太史
氏不敢以耄辭公諱雲姓花氏世為懷遠人自考以上

莫知遷徙世次公少孤隨母嫁張氏貌偉而黑驍勇絕
人儕輩畏服之歲癸巳仗劍謁上於臨濠上奇其材力
俾將兵畧地所至輒克破懷遠城虜其帥以歸進攻全
椒拔之郡寇據繆家寨公夜襲之寇散走上將取滁州
單騎前行遇賊數千人於道拔劍躍馬衝其陣而過賊
驚曰此黑將軍勇甚不可與爭鋒兵既至遂克滁甲午
從上取和州得卒三百以功授管勾明年乙未率所部
先渡江上克太平以公忠勇可信任任命宿衛左右丙申

上破集慶公得兵千人陞總管徇鎮江丹陽丹徒金壇諸縣皆下之過馬馱沙劇盜數百遮道索戰公且行且鬪三日夜皆擒殺之授前部先鋒攻常州拔其城駐守牛唐營夏六月立行樞密院於太平遂拜公院判階安遠大將軍丁酉春正月克常熟州獲卒萬餘命公將之秋七月以兵三千之寧國陷山澤中者八日羣盜蟠結梗道公操矛鼓譟出入營壘間斬首千百計而身不中一矢還命守太平後四年遂遇害時年三十有九夫人

郃氏公與偽漢戰時一子方三歲夫人以牲酒祭家廟
會家人泣曰今城且破吾夫忠義人必以身死之吾夫
死吾必不獨生然不可使花氏無後嬰兒在若等善撫
育之聞公就擒夫人赴水死年甫三十有五侍兒孫氏
瘞夫人屍遂抱兒以行偽漢軍虜之至九江軍中惡養
小兒孫氏以兒授漁家屬之曰此兒良宜善視之是年
冬王師伐偽漢漢敗孫氏至漁家視兒在矚漁人出竊
負以走夜宿陶穴中天曙脫簪僦舟渡江遇漢潰軍奪

舟棄江中孫氏抱兒遇斷木浮至附之入葦洲採蓮實

哺兒七日不死夜半聞人語聲呼之逢老父號雷老告
之故與其偕行明年辛丑二月達上所孫氏泣抱兒拜
上上亦泣寘兒于膝曰此將種也賜雷老衣遣之詔復
其徭已而令人追之忽不見兒八歲侍皇太子就學年
十三授虎賁右衛副千戶後七年拜令官即煒也煒於
洪武丁巳偕孫氏至太平奉夫人骸骨歸乃束草像公
以二月己未合葬上元縣南五十里之水橋嗚呼觀公

之死賊與妻妾之報公可以知公之為人矣天不殄其
後豈不宜哉銘曰

雲雷邁屯宇區分篤生真人鎮乾坤騎龍鞭霆下天門
前翼後衛溺若雲誰其最雄花將軍力驅智駕敵萬人
蹂躪羣盜猶磨磨大刀長戟屬橐鞬左麾右刺流電奔
緋衣緇弁貌虎屯駐馬飲江江水渾吳越之域殺氣昏
手挽天河洗妖氛軍聲隆然若雷震遭者膽落兩足蹲
元戎開府大江濱腰佩兵符威令尊控制上游為國藩

偽漢恃力不圖存建旗揚帆事征鼙艨艟蔽江躡鉤援
槌牛享士士氣伸馳馬督戰寧顧身賊焰熾若烈火焚
大戰三日勢愈殷單騎赴之齒齧齟怒髮上衝氣如烟
叶汝賊兇頑犬與豚願醢汝肉一口吞賊慙耳塞不忍
聞至死不屈酬國恩飄然乘雲叩帝閭請為厲鬼扼賊
元賊當殛死洗厥冤天子下詔褒忠勲東丘建侯賁九
原孤兒保育寵便蕃不墜宗祀天所敦生為烈士死明
神神靈在天光煇煇嗟爾來觀萬子孫繼忠思孝慎勿

諛弗信請考太史文

故翰林侍講學士中順大夫知制誥同脩國史

危公新墓碑銘

宋濂

嗚呼翰林侍講學士中順大夫知制誥同脩國史危公
享年七十以洪武五年春正月二十三日卒於和州含
山縣之寓舍其年二月十五日權厝於含山某年月日
始還葬金溪白馬鄉高橋之原其子_於反_於寒深懼公之
功行世系不昭白于天下晝夜兢惕自為狀二萬言來

謁新墓之銘漁守官無暇久未克論撰春正月蒙恩致
政東歸私念公相知特深在前朝時欲引薦入史館及
今待罪禁林實與公為同僚相得甚驩於是評隲羣行
而勒文于碑其文曰公諱素字太樸姓危氏危本姬姓
周武王庶子某生而手中有文曰山因賜姓危氏封於
新其後居光州晉永嘉中建州刺史京遷建昌之南城
唐黃巢之亂全諷與其弟仔倡赤手起兵擒巢黨柳彥
章于象牙潭擢撫州刺史累官金紫光祿大夫檢校太

傳封南庭郡王南庭之後復遷撫之金溪白馬鄉譜圖
亡竟逸其名南庭十五世孫宋景定中進士通直郎知
臨安府仁和縣事元累贈中奉大夫江浙等處行中書
省參知政事護軍追封汝南郡公災震公之曾大父也
累贈資善大夫河南等處行中書省左丞上護軍追封
臨川郡公龍友公之大父也累贈榮祿大夫江西等處
行中書省平章政事柱國追封豫國公永吉公之父也
曾祖妣王氏彭氏祖妣劉氏皆封郡夫人郡之名如其夫

母劉氏黃氏並封豫國夫人公自至正元年用大臣交薦入經筵為檢討公年已四十一矣五年改承事郎國子助教七年除應奉翰林文字同知制誥兼國史院編脩官未上轉宣文閣授經郎兼經筵譯文官階文林郎明年復入翰林為應奉十一年遷儒林郎太常博士十三年轉奉訓大夫國子監丞擢兵部員外郎十五年陞奉議大夫禮部郎中拜朝散大夫監察御史遷工部侍郎明年轉朝請大夫大司農丞又明年陞中奉大夫大

司農少卿復入禮部為尚書十八年參議中書省事兼
經筵官次年進通奉大夫御史臺治書侍御史二十年
拜通奉大夫中書參知政事同知經筵事提調四方獻
言詳定使司後四年階陞資政大夫俄除翰林學士承
旨榮祿大夫知制誥兼修國史博囉特穆爾入相出為
嶺北等處行中書省左丞明年棄官居房山二十八年
閏七月元順帝北奔淮王特穆爾布哈監國承制復起
為翰林學士承旨上章控辭已而元亡迨入國朝召至

南京洪武二年授以今官三年兼弘文館學士俄有詔
出居和州閱再歲而卒公生四歲其大父即使公讀書
大父本黃氏子來繼於危知公能亢危氏宗督厲之尤
切年十五即通五經大旨據座為人師與同郡葛君將
曾君堅黃君呬葛君元哲更相警策窮日夜不休復徒
步臨川吳文正公澄清江范文白公棖之門質而正之
二公皆折行輩與之為禮吳公至恨相見之晚凡所著
書多與公參訂之虞文靖公集孫先生轍名德俱尊其

遇之一如吳公由是公之名震動江右間出游金陵或
以其文示南臺中丞張文穆公起巖張公以狀元為顯
官少所稱許獨推伏公曰危公為狀元庶幾相當老夫
有媿色矣張公入朝遂挾公俱行達官貴人慕公聲華
爭欲出其門下更相論薦唯恐失之公之檢討經筵也
一月進講者三講文皆屬公手公嘗敷繹民惟邦本之
言以進典領臣惡其峭直難之公曰經筵之職所以格
君心反不以民之疾苦告耶縱加罪罪在操觚者業當

之卒以進講順帝大悅詔賜經筵官酒公不飲復賜馬
湏一革囊金織文幣人一端皆有副已而有詔下中書
發錢粟千萬賑河南永平民萬口咸曰活我者經筵官
也公復移書執政請脩宋遼金三史乘傳行宋兩都訪
撫闕遺書成公之力居多順帝知公學問淵深特命註
爾雅較君臣政要公悉心為之不數月而成及進賜金
若干公辭曰臣職也何勞而受賜不敢奉詔尋有宮人
之賜公復辭曰臣有糟糠之妻在大江之南無所用之

亦不受其助教成均也六館生擇所疑羣揖難公公片
言折之悅而去分監上京輟餐錢建監門葺齋舍勒開
國以來分教師之名于石尚書王某致政居蔚州構暖
泉書院請額于朝他監官以地無先賢故事不從公聽
其立師以訓士子順帝以公善筆札詔書釋氏書公辭
曰臣官冑監以教化民彝為職外教之典不宜書無已
遷他官乃可耳遂止其授經宮學也受業生皆貴戚大
臣子橫肆不率度公創教條置帳厯日書其勤惰月會

而賞罰之皆畏服不敢犯其在太常也請親祀南郊築
北郊以斥合祭之非謹諡法嚴祀典以祛謬妄時翰林
承旨張公翥為博士禮文有闕者同補正之人稱為雙
壁其為國子監丞也捐束脩餒小學書及夏小正經傳
攷于梓以惠學者其居兵部也奉詔墾田於雄霸二州
相地授畧薙除荆棘闢田幾千萬畝使民有道民德之
其陞禮部也與許文正公衡之孫克學俱贊皇太子受
玉冊故事皇太子謁廟用牲醴百官以朝服賀於東宮

公謂克學曰儻有違禮人惟責吾二人盍正之遂撤牲

醴而以便服賀其擢御史也知無不言御史觀音保等

四人以諫死英宗朝公請錄其後官之四川行省平章

政事囊嘉特天厯初舉兵欲翊戴明宗雅克特穆爾巴延

等搆殺之公力為雪其冤容城民魏敬益買田千畝後

見鶩田者二十家不能自生以田券還之公請旌其門

以敦廉讓其在工部也順帝欲以蒙古書譯釋氏三藏

經下部刊行公以無益諫罷之執政居第與燒飯橋近

有司希其意欲鑿石易橋公諍止之降香祀獄瀆故用金十兩為香函吏利金以銅半雜之或造銅函易金公廉其狀皆執論誅之淮南兵亂公奉旨廉問其故會維揚京口歲饑民欲相食公便宜諭守臣發楮幣數萬錠賑之所全活者甚衆上淮西宣慰使余闕捍賊功狀請陞其官秩復請立宋徐節孝書院于淮安其官大司農也凡京南保定之境幾無曠土時海輸不至軍國多仰焉新城民田氏聽後妻讒殺其子公憤之職既不可治

乃為文祭其子民悔愧後妻逃去人搖手相戒不用婦
言其長禮部也時亂將亟公憂之每陳得失無隱丞相
賀惟一曰君向寡言今又何多也公曰時危恩重情豈
能默默吾不敢畏丞相但畏後世史官耳其參議中書
也論天下事以擇將帥舉賢才為本請專任甘肅行省
平章鼎珠總西方兵勿遣其迎帝師誤軍事用樞密副
使布延布哈為中書參政經畧江南以額森特穆爾黃
常為禮部尚書頒歷安南立兵農宣撫使司以安畿內

任賢守令以撫流竄之民順帝欲以公兼兵農宣撫使
公以疎遠辭且諫曰今日之事宜卧薪嘗膽以圖中興
可也公言雖愈加切時不能盡用舊制銓曹有行止科
吏主之日具内外官使十名上中書中書藉以遷擢其
後吏怠不為意仕者淹滯有待選十餘年者公責吏日
具五名五日一上中書吏樂易集各思奉職而久滯者
獲伸高原富民劉强通其子婦婦訴官達刑部吏受賕
欲緩其獄以俟赦公以事關倫理趣如法論之其轉侍

御史也亂兵殺易州達魯噶齊公請假守令以制兵之

權會中書左丞成遵而下以賊得罪獨賀丞相鄂掄平

章與公不與皇太子書澄清忠義清白傳家八字以褒

賜之其參知政事也刑部尚書托里圖兼興和路編管

與守將有隙守將誣其欲擅發官困糧廷議杖逾百免

其官公驗無發封狀釋不問都事倪晦與劉哈喇布哈

同官丞相台哈布哈幕府數以公事忿爭劉怒欲中晦陰

結監察御史劉君楚俾擠之會晦至燕都囊故人所寄

買馬白金君楚攜其囊得金下晦獄令自伏為贓狀上
中書公疑亟為白出之馬德守德州俘所獲南軍千戶
楊甲至都將斬之公召問狀乃淮安世襲千戶戰敗陷
濟南羣盜中陳柔俾詣德軍饋物德械送之非賊也公
白宰相釋之楊感泣曰參政生我枯骨中惠大無以報
然參政長者為公法釋我我不敢私謝期以忠義報可
也卒與逆臣博囉特穆爾戰死之太醫院經歷徐某藏
盜賊盜敗徐就鞫案已具要官庇徐屬之從末減使三

返公竟不許嶺北行省參政董復初素有廉名同省臣
飛書言其在稱海宣慰司時取官中米千石公疑其事
遣使覈覆之果得其誣博囉特穆爾庫庫特穆爾俱以
平章總兵河南漸生釁端公謂御史大夫布哈曰養虎
者欲其不相搏噬則別其牢今欲二人無鬪莫若加其
職而分地處之用博囉特穆爾為丞相治四川以庫庫
特穆爾為丞相治河南各責其成功可也大夫曷不為
上言之布哈如公言順帝及皇太子咸以為然會丞相

綽巴戡喪妻不出事中寢初江南經畧使布延布哈李

國鳳請封徽國朱文公為齊國以龜山楊公豫章羅公
延平李公西山真公九峯蔡公從祀於孔子廟庭公為
御史時亦請封謚劉蕡事上中書皆寢不報至是公皆
舉行復為文以少牢躬祭蕡墓禮部員外郎姜碩使偽
漢陳友諒不屈而死公為奏官其子京畿歎國用不足
公奉旨以錢幣誥敕募民入粟公以義諭民聞者感動
荷負來輸者填道至有不願給直者上都宮殿火順帝

勅重建大安睿思二閣公上書諫曰苟以二閣為祖宗
所建四海九州獨非祖宗故物乎會皇太子大臣亦以
為言遂罷其役其以左丞居嶺北也和寧為太祖肇基
之地而無圖志可徵公請於朝作和寧志先是夏侯尚
玄嘗伏闕上書言郅王某之冤公高其義補其子宣使
時伊蘇岱爾為省平章挾私憾殺右丞達爾瑪巴拉公曰
是尚可以仕乎不去禍且及即上章辯荅里麻巴無罪
辭官去居房山卧不起將相重臣皆以書請不聽丞相

實勒們來問計公曰撫軍院誤國至斯不可救矣亟請
河南王庫庫特穆爾總兵以衛畿甸而固守之當時事
勢已不可為及再入翰林僅一日而大兵入燕公曰國
家遇我至矣國亡吾敢不死趨所居報恩寺俯身入井
將就沈溺寺僧大梓與番陽徐彥禮力挽起之且謂曰
公毋死公不祿食四年矣非居任比且國史非公莫知
公死是死國之史也已而兵入府藏垂及史冊公言於
鎮撫吳勉輦而出之由是累朝實錄無遺闕者公之力

也其入國朝也皇上嘗訪以元興亡之故甚見禮重俾之侍講禁林宋穆陵顱骨為嘉木揚喇勒智所發後入宣政院西番僧相傳授為祭器公言於上索取瘞之聚寶山時公春秋已高雅志亦不復仕矣公厚重深中有容寡言笑聞人詆毀如不知與人交有禮雖貴顯恒若貧賤時平生好薦賢先後所引若翰林學士劉君獻待制黃君昂等七十餘人至通顯者甚衆累持文衡考試多士人服其公樂善好義若有督之者凡事有關於名教可

以勵風俗者必為之乃已居官清慎節儉遇凶歲輒疏食不御酒倉吏進祿米贏七斗時斗可易白金五兩公命歸之官奉勅書徽政院使圖們岱爾神道碑其從子以白金五十兩為公壽公却之曰國體當爾居中書凡請文來謝者皆不受故人妻子不能衣食者厚賙而生之从嘗請仕公曰賢才未進吾敢私爾乎公博學善文辭至正中獨以文鳴天下凡朝廷制作皆出自公手四方欲顯白先德者皆造公門尤精于書得片楮隻字者

寶秘以為榮有文集五十卷奏議二卷宋史稿五十卷
元史稿若干卷藏于家公娶舒氏先三十年卒再娶趙
氏先十一日卒俱封楚國夫人子男子二人从至正二
十年進士第累官承直郎大都路同知薊州事今為安
慶府儒學教授游登仕郎大都儒學提舉亦前十年卒
女六人一適同邑曾仇堅之子也餘皆天孫二人長太平
天次德童嗚呼天之于人不能以俱全也久矣或授之
才而不假以位或畀以位而不畀以時此奇才偉德之

士常困而不施而生民所以鮮蒙其休澤也惟公以淵
深之學精純之文嘗都顯要之地海內仰之如祥雲景
星亦可謂有得於天矣而逢時亂亡不獲大展以死豈
不可哀乎雖然觀其所自著者固足以不朽矣銘曰

二氣孕精至文乃生凝為川嶽煥為日星天地之文因
象以示象默無言非人莫著往古百代作者孔多迄今
有聞其能幾何元興朔方氣淳而龐駿烈宏謨震盪萬
邦積盛而彰實在君子維八十年其績甚偉卓茲危公

起大江西與學醇辭孰能與齊在至正初交薦而升敷
繹聖經以牖帝明中原荐饑黎首告病公跽而言民為
國命同列畏聞吐舌改容當宁褒嗟曰維汝功往師成
均矇瞽有相化其囂荒趨厥禮讓貝葉之文有詔俾書
非職所宜正色控辭或服豸冠或為宗伯或居中臺或
參廟畫孰寃弗雪孰善弗褒孰蠹孰莠弗除弗孳白之
擢之予之錫之剔之殛之扶而植之彼何不思多言是
訾曰匪其然吾畏後世南風泱泱耆老淪亡屹如丘山

以鎮四方疆土日蹙孰不震動謂尚有公恃以無恐權

姦肆威盜秉國鈞畏公有言出為藩臣政亂無章倚勢
相戮公駭而吁吾何可祿微服宵趨房山是居庶士惶
惶如涉失桴天兵北征驅雷走霆有耳莫聆燕社已傾
公曰國亡吾曷不死公忍不死以存國史大明方隆多
士景從有詔任公侍講禁中昔豈不仕弗獲行道時之
可為公則既老維古賢士立德樹勲苟有弗施著之斯
文公文之純大音玄酒道則在茲爵祿何有孰高為山

孰深為淵文之有傳終古昭宣

元故翰林待制黃殷士墓碑

宋濂

皇帝登大寶之明年即詔執政大臣曰元氏有國一百六十三年雖臺社已屋歷數有歸國可減史不可減卿選江南知名之士不仕於元者纂脩成書而命翰林學士宋濂為之總裁庶幾得筆削之公以副朕意中書下其事濂等既奉詔執筆唯謹而於黃公殷士之沒寘於忠義傳中殷士之高第弟子鄧東復來請曰國史繫天

下之公法當嚴墓碑紀一人之私理宜詳懸緯有石願
先生為書之按東所造事狀殷士諱昂殷士其字也臨
川金溪化原里人未冠謁吳文正公澄於郡庠公方類
解小戴禮殷士撰書上公列諸家箋疏得失若分黑白
尋往學文於虞文靖公集揭文安公傒斯三公皆江右
人見殷士無不器重以遠大期之已而聞直清先生祝
公蕃倡明象山陸氏之學於鄱陽與同舍生王企不遠
數百里往候焉一見之頃欣然有契於眉睫之間歸而

喜曰曷豈昧其本心者哉自是一動靜一云為惟心是
監凜然若上帝之臨久之東游吳會以發越精神還遯
羽陽山中既而嘆曰學者將用世爾奈何自秘耶乃走
燕都受知中書參知政事多爾濟巴勒公及丞相賀公惟
一賀公當國授淮南等處行中書省照磨遷國子助教
陞博士特除翰林待制兼國史院編脩官階奉訓大夫
時權臣秉政天下大勢已去殷士憂國愛君晝夜不遑
寧屢上疏陳大計竟不報殷士方彈指長嘆同列以從

宜適變之機為問殷士曰此言何以至於我哉今日辟
朝空宮以淹國卹我之不能為公存猶公之不能為我
亡也盍亦各諗所安乎洪武元年八月庚午都城陷大
明兵入城殷士謂其從人張午曰吾為士子義不可辱
國汝幸收吾骨南還即解衣投居賢坊井中午倉皇大
慟拾級下救之見殷士浮沈水間氣猶未絕遽負之以
升獻欵言曰今南兵不殺在儒臣尤所賓禮他日幸致
富貴君何為自苦如是耶縱曰為國盡忠未聞小臣而

死社稷也殷士曰齊太史兄弟皆死小官彼何人哉午
終不解還舍治酒殺使家人歌舞為懽環守至日晡會
大將軍徐公達下令凡勝國之臣俱輸告身於官朝暮
一見各署名於冊違則罰殷士聞之給午曰吾今知汝
意矣汝言良是也可取吾告身來第吾慚見同朝人必
乘醉可往耳何所可致醇酎乎午大喜持錢出沽闌闌
中及還求之弗得亟往視井傍冠裳帶烏列寘不柰殷
士死已久矣其壽六十一云午買棺以斂同知鄒州事

陳介北山僧梓共營葬事以某月某日瘞于西山且刻石記之曾祖某祖某父某皆力本尚農享上壽以終娶里中桂氏隱士兢之女兒也有遠識勸夫遊學毋以家事自累無子而先沒殷士既貴顯或勸求昏甲族以媒榮進殷士曰邨之共姜宋之伯姬區區一婦人尚以節義自守況男子者乎吾弟幸生男即吾為有後矣性嗜古文而尤長於詩補作古樂府詩題音度和雅無愧於古四方士大夫多購求藏棄為榮金華黃文獻公潛於

人慎許可獨推獎之不置且與之通譜系云嗚呼天地之間有正氣焉日月以之而光華海嶽以之而流峙在人則為忠為義其人雖沒其氣則千載如生誠古今之常經國家之大防也有如殷士當元運將終誓與國俱亡從容就死而無悔比一時慷慨而殺身者則有間矣非其不昧本心之學能致是乎自古有天下者未嘗不以褒崇忠義為先務皇上即位之初蔽自淵衷即勅有司建元忠臣行臺大夫福壽余忠宣公闕二廟以春秋

奉祠事所以風厲於萬方者聖謨至深遠矣州郡或以
殷士之事上聞旌寵之典其有不降下者乎銘而列之
非為殷士也靈承上意以勸世之為人臣者銘曰

烈烈黃公元之小臣乃能為國殺身成仁人所大欲壽
為最貴孰能舍之自絕於世壽固可欲義不可虧毫髮
有愧雖生曷為吾死死義直氣貫天中不死者何千萬
年小夫苟全一愧一死不知百齡其死凡幾有冽者泉
其深無底奮身一躍眼不見水精魄入地肯隨物融化

為白龍上朝帝宮爾死得死百世宜祀盤綬金章誰非
臣子

明文衡卷八十